


Mr.: 冲破难关, 活出我自己

2026 年广州首场热血又温馨嘅摇滚 show, 一定係由 Mr. 乐队 DASH、MJ、Ronny、Tom 带来嘅“轻狂岁月”音乐会最终场。由中山首站到今次收官, Mr. 重聚嘅半年里, Color 一路相伴, 陪住大家重温佢哋岁月里嘅轻狂。

郭玮/文 李明珍、秦丽莹/图




甜蜜表白

演出以《我总会愿意》开场, 歌声里既有对旧日挚友嘅怀念, 亦有对如今重聚嘅感恩, 更寄托住未来继续同行嘅愿望。全场观众都係 Mr. 嘅“狂迷”, 亦成为演出嘅“主唱”, 大家齐声合唱经典, 已成所有人默契嘅演绎。来到“轻狂岁月”最后一站, 大家纵有千言万语嘅不舍, 但 DASH 话, 所有想讲嘅嘢, 都係 Mr. 嘅音乐中, 唱俾大家听。喺当晚嘅舞台上, Mr. 首次献上新歌《绿野仙踪》Live 版, 纯粹嘅木吉他配以悠闲沙锤, 民谣曲风带观众回到最初嘅记忆中。大屏幕同步播放 MV, 四人喺树林、球场、草地自在唱歌嬉戏, 如孩童般无忧无虑。呢首歌同 Mr. 以往嘅热血摇滚好唔同, 係少有嘅甜蜜小情歌。曲词创作兼主唱 MJ 话, 要特别唱俾女朋友听。MJ 讲嘅时候腼腆又得威, 睇得出佢创作时满载爱心。歌中唱到: “一直去爱, 而你是我生命答案”, 亦呼应返 DASH 曾喺 Mr. 首个重聚舞台上讲过嘅“有爱嘅地方就有 Mr.”, 温柔表白经历过“轻狂岁月”嘅你我他。



活出自己

再次同 Mr. 倾计, Color 君发现佢哋嘅变化: 重聚后首个舞台, 佢哋仍有少许不安; 来到收官站, 佢哋明显更从容自信。呢次巡演一路走来, 除咗工作团队嘅努力, 最重要係所有“狂迷”嘅陪伴。DASH 曾话佢哋都係凡人, 正因有大家嘅支持, 先令佢哋变得不平凡。喺新嘅一年, 每位成员都衷心祝愿大家身体健康, 有机会玩更多音乐。“贪心”嘅 DASH 就希望 Mr. 可以变得更好。想将愿望“私有化”嘅 Tom, 则希望操练自己, 以更好状态迎接挑战, DASH 同 MJ 即刻帮佢制定“减磅计划”, 四人又开始嘻嘻哈哈。面对外界嘅声音, Mr. 最重视始终係队员心声, 同时大家嘅意见同建议佢哋都收到了, 改进不足、做得更好, 坚持佢哋做音乐嘅初心。正如《轻狂岁月》所唱: “难关再多, 也要活出我自己”, Mr. 会坚持自己认为嘅嘢。



无限期待

经常以各种形式同歌迷互动嘅 Mr. 表示, 佢哋好想知道多啲大家嘅想法, 未来嘅日子, 期待大家提供多啲 idea 俾佢哋, 谗下点样一起玩、一起嗨。MJ 知道大家好忙, 但依然想努力一下, 争取今年可以完成新专辑, 俾歌迷新惊喜。Ronny 话“轻狂岁月”巡演嘅收官并非结束, 而係另一段新旅程嘅开始。不如大家同 Color 一起期待佢哋接下来嘅惊喜啦。

